



ЖАС БУЫННЫҢ ҚАБІЛЕТІН ШЫҢДАУ – БАСТЫ НАЗАРДА

Мемлекет басшысы Қасым-Жомарт Тоқаев елордадағы бірқатар нысанды аралап көрді. Президент, ең алдымен, Kazakhstan International School Astana (KIS Astana) мектебіне барды.



ЕЛІМІЗДЕ БІЛІМ БЕРУ ДЕНГЕЙІН АРТТЫРУ ӨЗЕКТІ

20 мың шаршы метрден астам аумақта орналасқан білім беру мекемесі 800 оқушыға және мектеп жасына дейінгі 120 балаға есептелген. Мектеп халықаралық бакалавриат (IB) аккредитациясынан өткен. Бұл беделді бағдарлама үш бағытты қамтиды. Атап айтқанда, 5-тен 10 жасқа дейінгі балаларға арналған бастауыш (Primary Years Programme, PYP), 11-ден 16 жасқа дейінгі балаларға есептелген орта (Middle Years Programme, MYP) және 16-19 жас аралығындағы ересек оқу-

шыларға бейімдеген дипломдық оқу бағдарламасы (Diploma Programme, IB) бар.

Оқу кабинеттері әрбір оқушының алаңсыз білім алуына және қарым-қабілетін ашуына қолайлы жағдай жасайтын заманауи технологиялармен жабдықталған. Сонымен қатар мектепте футбол стадионы, теннис корты, шағын футбол алаңы және бассейн секілді спорт инфрақұрылымы қарастырылған.

Мемлекет басшысы Қазақстанда білім беру деңгейін арттырудың маңызды екенін атап өтті. Әсіресе, жас буынның бәсекеге қабілетін шыңдауда әрі жан-жақты дамытуда осындай оқу орын-

дары ерекше рөл атқаратынына назар аударды.

СПОРТ ИНФРАҚҰРЫЛЫМДАРЫН ДАМУҒА ЕРЕКШЕ МӘН БЕРІЛЕДІ

Сондай-ақ Қасым-Жомарт Тоқаев Астана қаласындағы заманауи QazSwim-Academy спорт орталығына барды.

Орталық директорының айтуынша, бірегей кешенде спортшыларды даярлауға қажетті барлық жағдай жасалған. Ересектер мен балалар ұзындығы әртүрлі бес бассейнде жаттыға алады. Оның бірі 50 метрлік болса, екеуі – 25 метрлік және

екеуі – 10 метрлік жүзу жолақтары бар бассейндер. Топтық жаттығулар 25 бағыт бойынша жүргізіледі. Сонымен қатар мұнда кәсіби жаттығу залы да бар.

Академияны жоғары технологиялық үлгіде жабдықтауға баса назар аударылған. Бассейндерге судың құрамы мен реагенттердің мөлшеріне автоматты түрде талдау жүргізетін әрі тиімді залалсыздандыру мен қауіпсіздіктің жоғары деңгейін қамтамасыз ететін испандық кондырғы қойылған.

Бұдан бөлек, нысан жүзуге қажетті ширататын арнаулы жаттығу құралдарымен жабдықталған.

Президент жас спортшылармен әңгімелесіп, мемлекет спорт инфрақұрылымдарын дамытуға ерекше мән беретінін айтты.

— Келешекте табысты болуларыңызға және олимпиада чемпионы атануларыңызға тілектеспін. Спорттың денсаулықты жақсартуда, сондай-ақ халықаралық жарыстарда еліміздің данқын шығаруда маңызы өте зор. Сіздердің жеңімпаз спортшы әрі еліміздің лайықты азаматы болатындарыңызға сенемін, — деді Қасым-Жомарт Тоқаев.

(Жалғасы 2-бетте)

МЕМЛЕКЕТ БАСШЫСЫ ҚАСЫМ-ЖОМАРТ ТОҚАЕВТЫҢ РОЖДЕСТВО МЕРЕКЕСІМЕН ҚҰТТЫҚТАУЫ



Құрметті отандастар!

Еліміздің барша православ христиандарын Рождество мерекесімен құттықтаймын! Жұртқа жақсылық пен үміт сыйлайтын осы жарқын мейрамда діндар жандар адами құндылықтарға қызмет ету жолында өзара бірігеді.

Рождествода азаматтар ерекше қуанышка бөленеді, православ дінін ұстанатын адамдар жақындарына қамқорлық көрсетіп, мұқтаж адамдарға жанашырлық танытуға асығады.

Православ діні елдің берекелі бірлігі мен ырысты ынтымағын нығайта түсуге, жалпыұлттық бірегейлігіміздің өзегі саналатын отаншылдық, жасампаздық және жауапкершілік сияқты құндылықтарды дәріптеуге мол үлес қосып келеді. Қоғамдағы татулық пен түсіністік Қазақстанның тұрақты дамуының мызғымас тірегі болып қала беретініне кәміл сенемін.

Еліміздің православ христиандарына зор денсаулық, бақ-береке және толағай табыс тілеймін! Рождество мерекесі құтты болсын!

ТАҒАЙЫНДАУ

Президент Жарлығымен Дархан Амангелдіұлы Сатыбалды Қазақстан Республикасы Президентінің Әкімшілігі Басшысының бірінші орынбасары болып тағайындалып, бұрынғы атқарған лауазымынан босатылды.

Президент Жарлығымен Нұралхан Оралбайұлы Көшеров Түркістан облысының әкімі лауазымына тағайындалды.

МӘСЕЛЕ

ЕСІРТКІМЕН КҮРЕСКЕ ЕКПІН БЕРІЛЕДІ

Биыл есірткі саудасына қарсы ауқымды «соғыс» жарияланған жыл ретінде тарихымызда қалуы мүмкін. Президент кез келген ұлттың тұқымын тұздай құртар ғасыр кесепатымен сұрапыл шайқастағы тарихи бетбұрысқа жол ашатын заңға қол қойды. Ол осы күреске тартылған құрылымдарға жетік тетік, жойқын арсенал ұсынады. Мысалы, «есірткі барондарының» тірегін күйрету үшін қызмет бабын теріс пайдаланған шенділер де өмір-бақи түрмеге жабылады. Қылмыстық кодексте жаңа жаза түрлері пайда болды. Өзге де жаңалықтар өмірге жолдама алды.

→ 5

БҮГІНГІ НӨМІРДЕ:

АЛАШТЫ СҮЙГЕН АҚЫН



«Мен еш уақытта Қадекең өлең жазып отырғанда, басқа күндері де кітабын, өлеңдерін оқымайтынмын. Себебі жұмыс үстелінде отырған кезінде келе қалсам, жазып отырған дүниесін екінші парақпен жаба қалатын.

→ 6

ҚАР КӨШКІНІ ДЕ ҚАУІПТІ



Қыс айлары – алматылықтар үшін қысқы спорт түрлерімен айналысуға ең қолайлы кезең. Әсіресе, тау спортына қызығушылығы жоғары жандар үшін бұл маусым бойы асыға күтетін мезгіл екені белгілі.

→ 7

2025: ЖЕҢІСТІ КҮНДЕР ЖАЛҒАССЫН!

Жаңа 2025 жылы еліміздің спортшыларын үлкен жарыстар күтіп тұр. Халықаралық, олимпиадалық турнирлерде ұлттық құрамамыздың асығы алшысынан түссе дейміз. Биылғы жылдың күнтізбесі ұлттық құрамамыз үшін халықаралық ірі жарыспен басталмақ. Қытайдың Харбин қаласында IX Азия ойындарының жалауы желбірейді. Дода ақпан айының 7-14-і аралығында өтеді.

→ 8



7 ҚАҢТАР 2025 | СЕЙСЕНБІ

ЖАС БУЫННЫҢ ҚАБІЛЕТІН ШЫҢДАУ – БАСТЫ НАЗАРДА



(Басы 1-бетте)

БИЫЛ АСТАНАДА 7 ЖАТАҚХАНА ИГІЛІККЕ БЕРІЛЕДІ

Бұдан соң Қасым-Жомарт Тоқаев Л.Гумилев атындағы Еуразия ұлттық университетінің студенттері мен магистранттарына және докторанттарына арналған 2 656 орындық жана жатақхананы аралап көрді.

Мемлекет-жекеменшік серіктестігі негізінде салынған Студенттер үйі үш заманауи блоктан тұрады. Олардың әрқайсысы студенттердің жайлы тұрмысы мен білім алуына мүмкіндік беретін коворкинг аймақтармен, кітапханалармен, спорттық және коммерциялық орындармен жабдықталған.

Жатақхана құрылысында ерекше қажеттілігі бар студенттердің де талап-тілегі ескерілген. Оның дизайны мен инфрақұрылымы кедергісіз орта қалыптастыру талаптарына сай келеді.

Ғылым және жоғары білім министрі Президентке студенттерді жатақханамен қамтамасыз ету, елімізде шетелдік жоғары оқу орындарының филиалдарын ашу арқылы академиялық хаб құру шаралары жөнінде баяндады.

Мемлекет басшысы бұл бағытта жүргізіліп жатқан жұмыстарды оң бағалап, білім беру саласындағы және жастар арасындағы халықаралық ынтымақтастықтың маңызды екеніне назар аударды. Сондай-ақ жұртты алаңдатқан метапневмовирус туралы пікір білдірді.

— Қазір бәрі жана инфекция туралы айтып жатыр. Меніңше, одан дағназа жасаудың қажеті жоқ. Сондықтан Қытаймен ынтымақтастықты одан әрі дамытуымыз керек, — деді Мемлекет басшысы.

Қасым-Жомарт Тоқаев жатақханада студенттермен әңгімелесіп, Ана тілі газетіне берген сұхбатында айтқанындай, елімізде цифрландыру мен жасанды ин-

теллектті дамытуға ерекше мән берілетінін, бұл озық технологиялар әр салаға енгізілетінін жеткізді. Президент бұл ретте жастарға айрықша үміт артатынын атап өтті.

Жалпы, былтыр ел аумағында 11 079 орындық 40 жатақхана пайдалануға берілген. Биыл Астана қаласының өзінде 3 400 орындық 7 жатақхананы іске қосу жоспарланып отыр.

Бүгінде Л.Гумилев атындағы Еуразия ұлттық университетінде 4 280 студентке арналған сегіз Студенттер үйі бар. Сонымен қатар сегіз жеке жатақханамен ынтымақтастық туралы меморандумдар жасалған. Биыл Студенттер үйлеріндегі орын саны 10 мыңға дейін ұлғаяды. Бұл студенттерді жатын орынымен қамтамасыз ету мәселесін толығымен шешуге мүмкіндік береді.

ЖҰМЫСШЫ ЖАСТАРҒА КОЛДАУ КӨП

Мемлекет басшысы Астана қаласының №1 индустриялық паркіндегі электровоз құрастыру зауытын аралап көрді. Кәсіпорынды Индустрияландыру картасы аясында Францияның Alstom компаниясы іске қосқан.

Қасым-Жомарт Тоқаев кәсіпорынның жұмысы туралы жан-жақты мәлімет берілді. Зауытта «Қазақстан темір жолы» ұлттық компаниясының тапсырысымен 380 жүк және 70 жолаушылар электровозы шығарылған. Сондай-ақ олардың қосалқы бөлшектері өндіріледі. Бұдан бөлек, жүк электровоздарының 80 секциясы Әзербайжанға экспортталған. Қазір кәсіпорын нарыққа локомотив корпустары, трансформаторлар, төмен және жоғары вольтты шкафтар және басқа да өнім түрлерін ұсынады.

Президентке зауытта жана буын локомотивін құрастыру жобасы қолға алынғаны туралы баяндалды. Оның өзіндік құны бұрынғы нұсқасымен

салыстырғанда 40 пайызға төмен, ал тиімділігі 20 пайызға жоғары. Жаңа жүк электровоздарының өндірісі 2028 жылдан бастап іске қосылады.

Қазір Alstom компаниясы Астана, Алматы, Шу және Арыс қалаларында сервистік орталықтар ашуға инвестиция құйып жатыр. Бұл 700 жана жұмыс орнын құруға мүмкіндік береді.

Бұдан бөлек, Мемлекет басшысы теміржолға қажетті құрал-жабдықтар шығаратын отандық кәсіпорындардың өнімдері көрмесін аралады. Қазір елімізде 600-ден астам компания теміржол саласына арналған бөлшектерді өндірумен айналысады. Олардың өнімдері мен қызметі 25 елге экспортталған.

Электровоз құрастыру зауытында еңбек ететін жас мамандармен жүзде-

суде Президент 2025 жыл «Жұмысшы мамандықтар жылы» болып жарияланғанын еске салып, мемлекет өндіріс саласында жұмыс істейтін жастарға қолдау көрсете беретінін айтты.

ҚҰРЫЛЫС – ЭКОНОМИКАНЫҢ МАҢЫЗДЫ БАҒЫТЫ

Сонымен қатар Президент елордадағы құрылыс индустриясы нысандарымен танысты.

Asyl Qala – 100-ден астам адам еңбек ететін арнаулы кәсіпорын. Жобаға құйылған инвестиция көлемі 8 миллиард теңгені құрайды. Кәсіпорынның қуаты тәулігіне 4 500 шаршы метр тротуар жабдығын өндіруге жетеді. Құрылыстың екінші кезеңі аяқталған соң бұл көрсеткіш 9 000 шаршы метрге дейін ұлғаяды.

Бүгінде аталған кәсіпорында шығарылған өнімдер Астана және еліміздің басқа да қалаларында пайдаланылады.

Бұдан кейін Мемлекет басшысы автоклавты газ блоктарын шығаратын Unipon зауытымен танысты. Sensata Group құрылыс компаниясына қарасты кәсіпорын жылына 150 мың шаршы метр газ блоктарын өндіре алады. Жоба «Даму» қоры және Өнеркәсіпті дамыту қоры арқылы қаржыландырылған. 110 адамды тұрақты жұмыспен қамтып отыр.

Қасым-Жомарт Тоқаев құрылыс индустриясы экономиканың маңызды бағыты екенін атап өтіп, жергілікті өнім көлемін арттыру қажеттігін айтты.

Мейір ЖАСЫН



Ойтоғыз

Мәулен ӘШІМБАЕВ,

Сенат Төрағасы:

ЕЛДІК МҮДДЕ ЖОЛЫНДА ЖҰМЫЛУЫМЫЗ КЕРЕК

Президентіміздің ашықтық, диалог, әділеттілік қағидатына табан тіреген саясатының жарқын көрінісі екені анық.

Жалпы, Президентіміз Қасым-Жомарт Тоқаев айтқандай, былтыр кешенді бастамалар жалғасын тауып, еліміз елеулі нәтижелерге қол жеткізді. Инфрақұрылымды жаңғырту бағытында айтарлықтай жұмыс қолға алынды. Сондай-ақ 18 млн шаршы метр тұрғын үй пайдалануға берілді және 7 мың шақырым жол салынып, жөнделді. Алматы, Қызылорда және Шымкент әуежайларында жана терминал іске қосылды.

Өндеу секторының өнеркәсіптегі үлесі өндіру саласының деңгейіне жуықтады. Дикандар 27 миллион тоннаға жуық астық жинап, соңғы жылдардағы рекордтық көрсеткіш тіркелді. Бұл Қазақстанның ауыл шаруа-

шылығы саласындағы әлеуетін арттыра түскені сөзсіз.

Әлеуметтік мемлекет ретінде елімізде бұл бағытқа баса мән берілді. Осыған байланысты былтырдан бастап «Ұлттық қор – балаларға» бағдарламасы аясында төлем беріліп келеді. Зейнетақы, жәрдемақы, шәкіртақы және азаматтық сала қызметкерлерінің жалақысы көбейді. Еліміздің түкпір-түкпірінде жүздеген жана мектеп, балабақша және шетелдік жетекші жоғары оқу орындарының бөлімшелері ашылды.

Соңғы жылдарда мемлекетіміздің экономикалық әлеуетін, егемендігін және халықаралық аренадағы орнын нығайту бағыттары бойынша ауқымды жұмыс атқарылғаны белгілі. Осы ретте барлық экономикалық реформа, ең алдымен, азаматтардың өмір сүру сапасын арттыруды көздейтінін айта кеткен абзал.

Сұхбатта кешенді реформаларды заңнамалық тұрғыдан қамтамасыз ету мәселесі де сөз болған. Осыған байланысты былтыр әйелдердің құқығын қорғау, балалардың қауіпсіздігін қамтамасыз ету, «Келешек» атты біріншілік ерікті жинақтаушы жүйенің қызметін жүргізу, несие алып, қарызға батпауға жол бермеу, есірткімен, лудоманиямен күрес және тағы басқа салаларға қатысты заңдар қабылданды.

Президентіміз осы жұмысты іске асыру жолында Парламент маңызды рөл атқарып келе жатқанын айтты. Бұл – біз үшін жоғары баға және зор жауапкершілік.

Мемлекет басшысы көктемгі су тасқыны мен Маңғыстау облысында болған ұшақ апатына да тоқталып, аталған сын-сағаттарда халқымыз ынтымақтың озық үлгісін көрсеткенін тілге тиек етті. Азаматтардың қоршаған ортаны қорғауға қатысты жауапкершілігін арттыра түскен жасампаз жоба «Таза Қазақстан» экологиялық акциясының маңызы да атап өтілді.

Президентіміз алдағы экономикалық жана реформалардың стратегиялық бағдарын да белгілеп берді. Соған сәйкес, шикізаттық емес секторларды дамыту арқылы экономиканың өсімін қамтамасыз ету мемлекеттік саясаттың негізгі бағыты болмақ. Сол үшін өндеу өнеркәсібін дамытуға, заманауи техно-

логияларды енгізуге және экономиканы әртарапандыруға баса мән берілді.

Тұрғын үй, жана жайлы мектептер мен медициналық нысандар салу арқылы әлеуметтік инфрақұрылымды дамыту жұмысы жалғаса береді. Сондай-ақ биыл – «Жұмысшы мамандықтар жылы» аясында еңбек адамының кәсіби көтеруге және еңбекқорлық, кәсібилік сияқты құндылықтарды дәрiптeуге ерекше көңiл бөлiнедi.

Сұхбатта халықаралық ынтымақтастықты одан әрі нығайтып, Қазақстанның әлемдік аренадағы орта держава ретіндегі рөлін күшейту мәселелері де айтылды. Талғардағы қылмысты оқиға, біріншілік сағаттық белдеу, мерзімінен бұрын сайлау мәселелері де назардан тыс қалған жоқ.

Президентіміз жас буынның белсенділігіне, олардың ел ертеңіне бейжай қарамай, барлық бастамаға үн қосып келе жатқанына назар аударып, өскелең ұрпақтың бойына дұрыс құндылықтарды сіңірудің маңызына да тоқталып өтті.

Жалпы, сұхбатта егемендігімізді нығайтуды және елімізді өркендетуді көздейтін басым бағыттар нақты белгіленді. Оларды іске асыруға әр қазақстандық атсалысып, елдік мүдде жолында бәріміз жұдырықтай жұмылуымыз керек. Сол кезде ғана заң мен тәртіп салтанат құрған, дамыған Әділетті Қазақстан қалыптастырамыз.

7 ҚАҢТАР 2025 | СЕЙСЕНБІ

ДЕПУТАТТАР ӨҢІРЛЕРГЕ БАРДЫ

Еске сала кетейік, 5 қаңтарда Мәжіліс депутаттарының өңірлерге жұмыс сапары басталды. Депутаттар өндірістік және әлеуметтік нысандарды аралап, еңбек ұжымдарында кездесулер өткізіп, азаматтарды жеке мәселелері бойынша қабылдайды. Сонымен қатар олар сайлаушыларға

қабылданған заңнамалық өзгерістер туралы ақпарат беріп, мәселелерін тыңдайды. Өңірлерде сайлаушылар көтерген ең өзекті мәселелерді шешу Мәжілістің жалпы отырыстарының бірінде Үкіметпен бірлесіп қаралатын болады.

ШЫҒЫСТА ОҢДЫ ІСТЕР КӨП



Шығыс Қазақстан облысына жұмыс сапарымен келген Парламент Мәжілісінің депутаттары Ұлықбек Тұмашинов пен Ерлан Саиров Өскемен қаласындағы гематологиялық орталықтың құрылыс жұмыстарымен танысты.

Бұл ірі жоба қан жүйесі мен кардиотамыр жүйесі ауруларын диагностикалау мен емдеудің жоғары деңгейіне шығаруға арналған. Сондай-ақ елдегі медициналық көмектің сапасын едәуір арттыруға мүмкіндік береді.

— Орталық «AMANAT» партиясының сайлауалды бағдарламасы аясында салынып жатыр. Осы жылдың соңына дейін нысан қолданысқа беріледі деп жоспарланып отыр. Құрылыс жұмыстарының уақытылы сапалы орындалуы партияның тікелей бақылауында

болады. Бұдан бөлек, былтыр біз медицина қызметкерлерінің кәсіптік жауапкершілігін сақтандыру туралы заң қабылдадық. Бұл заң дәрігерлермен бірге әзірленді және олардың мүддесін қорғауға бағытталған. Осы жолдағы жұмысты біз әрі қарай жалғастыра береміз, — деді Е.Саиров.

Нысан бірнеше корпусы камтиды. Бас ғимаратта химиотерапия күндізгі стационар, балалар стационары, соматика, ересектер гематологиясы, кардиология және кардиохирургия, сондай-ақ сүйек кемігін трансплантациялау бөлімшелері орналасады. Сонымен қатар консультациялық-диагностикалық бөлімше де жұмыс істейтін болады. Барлық құрылыс-монтаж жұмыстары кестеге сәйкес жүргізілуде.

— Қазір құрылыстың ішкі жұмыстары қалған. Тиісті құрал жабдықтар да сатып алынуда. Бекітілген мерзімде нысанның құрылысын аяқтап қолданысқа беру қажет. Айтпа кету керек, бұл шетелден кайтарылған активтердің есебінен салынып жатыр. Ендігі кезекте құрылыс сапасына бақылау күшейтіліп, барлық жұмыс белгіленген стандарттарға сай жүргізілуде тиіс. Нысанның уақытылы іске қосылуы өңір тұрғындарының өмір сүру жағдайы мен аймақтың дамуына елеулі үлес қоспақ, — деді Ұ.Тұмашинов.

Жобаның жалпы құны — 71,3 млрд теңге. Құрылыс басталғалы бері 37,7 млрд теңге игерілді. Қазір құрылыс жұмыстарының 78 пайызы орындалған.

КӨКТЕМГІ СУ ТАСҚЫНЫНА ДАЙЫН БА?

Мәжіліс депутаты, «AMANAT» партиясы фракциясының мүшесі Наталья Дементьева Аршалы ауданы Анар ауылында Анар-көл көлінің бөгетін қайта жаңғырту жұмысымен танысты.

Анаркөл көлі ауылдық округтің мынанан астам тұрғынын ауызсумен қамтамасыз етіп отыр. Өткен ғасырдың ортасында салынған ауыл мен көл арасындағы бөгет әбден ескірген. Оның ұзындығы 1300 метрді құрайды. Ауыл тұрғындарын тасқын судан қорғауға қауқарсыз. Осыған байланысты былтыр қайта жаңғырту жұмысы басталып, бүгінге дейін айналма каналдың бір бөлігі тазартылды. Бөгет қабырғасы нығайтылып, 6 метрге дейін кеңейтілді. Ондаған техника жұмылдырылып, кирыштық тас пен сазды топырақты қоса алғанда, 21 мың тоннадан астам құрылыс материалы жеткізілген.

— Мемлекет басшысы Қасым-Жомарт Тоқаев жуырда «Ана тілі» газетіне берген сұхбатында атап өткендей, былтыр жойқын су тасқыны болды. Зардап шеккендер

қатарында Аршалы ауданы да бар. Сондықтан алдағы көктемге дайын болуымыз керек. Мәжілісте жаңа Су кодексінің жобасы қаралуда. Мемлекет 2030 жылға дейін 40-тан астам жаңа су қоймасын салу және ел аумағында жұмыс істеп тұрған 37 су қоймасын жөндеу бағытында жұмыс жүргізуде, — деді Наталья Дементьева.

Жалпы, 2025 жылы Анаркөл көлі бөгетінің төменгі бөлігінде 15 су өткізу құрылысын орнату жоспарланған. Олар көлдің толуына және қорғаныс бөгетінің шайылып кетуіне жол бермейді. Жұмыс «AMANAT» партиясының сайлауалды бағдарламасы аясында жүргізіліп жатыр және партияның ерекше бақылауында.

Сонан соң депутат азаматтарды жеке мәселелері бойынша қабылдады.

ДЕНСАУЛЫҚ САҚТАУ МӘСЕЛЕСІ ҚАРАЛУДА

Мәжіліс депутаты, «AMANAT» партиясы фракциясының мүшесі Гүлдара Нұрымова Байзақ ауданы Қызыл Жұлдыз ауылындағы жаңа дәрігерлік амбулаторияның жұмысымен танысты.



60 емделушіге арналған медициналық мекеме «AMANAT» партиясының сайлауалды бағдарламасы аясында салынған. Мұнда 3 дәрігер, 13 орта медицина қызметкері және бір психолог жұмыс істейді. Аталған амбулатория ауылдағы 5 мыңға жуық тұрғынға қызмет көрсетеді.

Гүлдара Нұрымова ауылдағы дәрігер тапшылығы мәселесін шешу үшін ауылды жерлерге көшіп келген мамандарға 100 АЕК көлемінде көтерме жәрдемақы төленетінін атап өтті. Денсаулық сақтау мәселелері жөніндегі заңға енгізілген бұл норма «AMANAT» партиясының сайлауалды бағдарламасында қамтылған.

— Мемлекет денсаулық сақтау саласына үнемі ерекше көңіл бөледі. Биыл дәрігерлерді қорғауға, олардың мәртебесін көтеруге бағытталған сапалы жаңа заң күшіне енді. Бірқатар әлеуметтік кепілдіктер енгізіліп, құқықтық қорғау күшейтілді. Атап айтқанда, мектепке дейінгі ұйымдарда

медицина қызметкерлерінің балаларына бірінші кезекте орын беріледі, басы артық есеп беру мәселесі қысқартылды, дәрігерлердің кәсіби жауапкершілігі сақтандырылады және басқа да өзгерістер бар. Медициналық жоғары оқу орындарының жас түлектері олардың көмегі адамдарға шынымен де қажет екенін және мемлекет тарапынан жасалатын қолдау шаралары дәл осыған бағытталғанын анық түсінуге тиіс, — деді депутат.

Биыл өңірде партияның сайлауалды бағдарламасы аясында Байзақ, Қордай және Сарысу аудандарындағы аудандық ауруханаларды қоса алғанда, 7 медициналық нысанның құрылыс жұмысы басталады. Сондай-ақ Таразда туберкулезбен және өкпенің өзге де ауруларымен ауыратын балаларға арналған перинаталдық орталық, жедел медициналық жәрдем стансасын және мамандандырылған санаторий ашу жоспарланып отыр.

ЖАҢА МЕКТЕП ҚҰРЫЛЫСЫМЕН ТАНЫСТЫ



Мәжіліс депутаттары, «AMANAT» партиясы фракциясының мүшелері Павел Казанцев, Самат Нұртаза және Нартай Сәрсенғалиев Астана қаласы Үркер тұрғын алабындағы жаңа жайлы мектептің алдағы жұмысқа дайындығымен танысты.

Үркер тұрғын алабында мектептердегі орын тапшылығы мәселесі жергілікті тұрғындарды жылдар бойы толғандырып келді. Осылайша, «AMANAT» партиясының сайлауалды бағдарламасы аясында жаңа үлгідегі мектеп салынып, азаматтарды

аландатқан мәселе өз шешімін тапты. 9 қантарда аталған білім ордасының есігі 2 мың оқушыға айқара ашылмақ.

Нысанды аралау барысында Павел Казанцев Президент бастамасымен қолға алынған «Жайлы мектеп» ұлттық жобасының

маңызды басымдығының бірі отандық тауарлар мен қызмет көрсетушілерді қолдау екеніне назар аударды. Атап айтқанда, нысанды салушыларға қойылатын басты талап — жергілікті қамту үлесі кемінде 70 пайыз болуы.

— Реттелетін жиһаз, жабдық, құрылыс материалдары — толық дерлік отандық өнім. Яғни, 90 пайызы Қазақстанда жасалған. Мұндай тәсіл стратегиялық тұрғыда маңызды дер едім. Себебі Қазақстанда өндірілген өнімді пайдалану ұлттық экономиканың өсіміне ықпал етеді. Бұл — біздің жұмыс орындарымыз, экономика, қаржы айналымы, оның бәрі осында, — деді Павел Казанцев.

Өз кезегінде Самат Нұртаза еліміздегі демографиялық өсім қарқыны білім беру жүйесі үшін елеулі салмақ салатынына мән берді. Тиісінше, мектептердегі орын тапшылығы ең өзекті мәселенің бірі болып отыр.

— Бұл №33 мектеп әйгілі өнші Әміре Қашаубаевтың есімімен аталады. Ғимаратта оқушылар қауіпсіздігіне ерекше назар аударылғанын атап өткен жөн. Мемлекет басшысының бастамасымен қолға алынған ұлттық жоба аясында мұндай мектептер еліміздің шалғай елді мекендерінде де салынады, — деді депутат.

Бүгінге дейін Астанада бас-аяғы 11 жайлы мектеп ашылды. Жалпы, елордада ұлттық жоба аясында 90 мың оқушыға арналған жаңа үлгідегі 24 мектеп салынады.

БӨГЕТТІ ҚАЛПЫНА КЕЛТІРУ ЖҰМЫСТАРЫН ТЕКСЕРДІ

Мәжіліс депутаттары Еркебұлан Мәмбетов пен Дмитрий Колода аймақтарға сапары барысында Петропавл қаласы Ойқала шағынауданындағы бөгетті қалпына келтіру жұмыстарымен танысты. 1960 жылы пайдалануға берілген Ущев көшесіндегі нысан шаһарды су тасқынынан қорғауда елеулі рөл атқарады.



Былырғы алапат су тасқыны Солтүстік Қазақстан халқын біраз өбігерге салды. Соның салдарынан жүздеген тұрғын үй, бау-бақша учаскелері мен инфрақұрылым нысандарын су басты. Осыны ескеріп, теріскейліктер биыл алдын ала қамдануда.

Қазір өңірде 8 бөгет қалпына келтіріліп жатыр. Соның бірі Ущев көшесіндегі бөгетте Мәжіліс депутаттары болып қайтты. Бөгеттің биіктігі 4,5 метрден 7 метрге дейін, ені 3 метрден 6 метрге дейін, ал ұзындығы 300 метрге дейін ұлғайтылған. Бүгінде нысанға 205 мың тонна инертті материал жеткізілді. Бөгетті бетон плиталарымен нығайту жүргізіліп жатыр.

— Бұл шаралардың барлығы өткен жылғы жағдайдың алдын алу үшін қолға алынып жатыр. Былтыр тасқыннан көптеген адам зардап шегіп, орасан материалдық шығындар болды. Биыл бұған жол берілмейді деп сенеміз. Осы орайда бөгетті қайта қалпына келтіру жұмыстары қызу жүргізіліп жатқанына куә болып отырмыз. Ең бастысы құрылыс жұмысының сапалы әрі уақытында аяқталуы, — деді депутат Еркебұлан Мәмбетов.

Жобаның жалпы құны 851 миллион теңгені құрайды. Заманауи технология мен сапалы материалдар қолданылуда. Ол бөгеттің ұзақ мерзім қызмет етуіне септігін тигізеді. Жұмыстың сапалы орындалуы «AMANAT» партиясының ерекше бақылауында болады.

Былыр көктемдегі су тасқыны салдарынан облыста 4 мыңнан астам тұрғын үй, 45 кәсіпкерлік нысан, 42 автожол учаскесі зақымданған болатын.

